



30. juni 2011

Inatsisartut suleriaasianni § 37 naapertorlugu tulluuttunik apeqquteqarpunga:

Naalackersuisunut apeqqutit:

1. Meeqqat atuarianni immikkut atuartitsinermut atatillugu Naalackersuisut, KANUKOKAp, Inerisaaviup PPR-illu akornanni suleqatigiinnermut qanoq attuumassuteqartoqarpa?
2. Meeqqat atuariannit inaarutaasumik soraarummeernermi atuartut angusaasa assigiinnginnerinut atuartut inooqatigiinnikkut aningaasaqarnikkullu atugarisaanik misissueqqissaarneq nassiuiaatit pingaarnersaasa ilagimmassuk, atuartut immikkut ittumik atuartinneqartut imaluunniit immikkut ittumik perorsaa-riaatsimik tapersorsorneqartut Naalackersuisut immikkut ittumik qitiutinniarpaat?
3. Atuartut immikkut ittumik pisariaqartitsisut atuartissinnaajumallugit ilinniartitsisut immikkut ittumik ilinniartitsisartut tamarmik pinngitsooratik ilinniarsimasuunissaat imaluunniit pikkorissartarnissaat Naalackersuisut sulissutiginiarpaat?
4. Immikkut ittumik ilinniartitsisoq immikkut ittumik ilinniartitsinerminut atatillugu ilitsersorneqarusukkuni siunnersorneqarusukkuniluunniit, ilinniartitsisoq sumut saaffiginnissava? Aamma immikkut ittumik ilinniartitsineq eqqarsaatigalugu perorsaariaatsimut akisussaaffimmik tamarmiusumik eqiteriffiusumik immikkoortoqarfeqarpa? Imaluunniit meeqqat atuarianni immikkut ittumik atuartitsinermut piginnaasat akisussaanerlu akerlianik immikkoortoqarfinnut assigiinngitsunut agguataagaappat? Kingulleq attuuppat, taamatut inneranut tunuliaqutaasoo pillugu Naalackersuisut nassuiaateqaqquneqarput, aammalu taamatut inneratigut suut pitsaaqutitut aamma/imaluunniit ajoqutitut Naalackersuisut isigineeraat nassuiaqquneqarluni.
5. Atuartut immikkut ittumik ilinniartinneqartut meeqqat atuarianni inaarutaasumik soraarummeernernut ilumut peqataasannginnerat Akileraartarnermut Atugarisaarnermullu ataatsimiititaliarsuup allassimasaa (qupperneq 31) eqqortuuva, taamaassimappallu tamanna naapertuuttutut isigineqarpa?
6. Meeqqat immikkut ittumik atuartitaasimasut meeqqat atuariata kingorna qanoq pisarnerannik oqaluttuarsinnaasunik ilisimasanik paasissutissanilluunniit tulleriin- nilersorsuugaasunik peqartoqarnersoq Naalackersuisut oqaatigisinnaavaat?
7. Immikkut ittumik atuartitsinerup sunniutaa misissorniarlugu, immikkut ittumik atuartitsinerup nalilersornissaa pillugu Naalackersuisut eqqarsaatersuuteqarpat imaluunniit aalajangersimasunik pilersaaruteqarlutik? Aamma misissuinermik taamatut ittumik ilaannakortumilluunniit siusinnerusukkut ingerlatsisoqareerni-

kuuva? Misissuisoqarsimappat, misissuinerup inerneru pillugit Naalakkersuisut naatsumik nassuiaateqaqquneqarput.

8. Siunissami immikkut ittumik atuartsineq allatigullu immikkut ittumik perorsaariaaseqarluni ikiorsiineq pillugit Naalakkersuisut sunik takorluugaqarpat?
9. Akileraartarnermut Atugarissaarnermullu ataatsimiititaliarsuup oqaatigaa nalinginnaasumik immikkut ittumik atuartsinerup aamma annertusisamik immikkut ittumik atuartsinerup immikkoortinneqarnerisa ingerlateqqiinnarnerat kommunit aamma Namminersorlutik Oqartussat avitseqatigiillutik aningaasalersuinerannut atatillugu ajornartorsiutinik nassataqartartoq, taamatut avitseqatigiittarnikkut kommunit aningaasaqarneq pissutigalugu atuartut immikkut atuartsinermut nalinginnaasumut innersuunnagit immikkut atuartsinermut annertusisamut innersuussinissartik orniginerusarunarmassuk. Ajornartorsiut tamanna, tamatumalu kinguneranik aningaasatigut qanoq annertutigisumik kinguneqarnera Naalakkersuisut qanoq nalilerpaat?
10. Ungasinngitsukkut isumasioqatigiinnermi IIN-imit aqqissugaasumi oqaatigineqarpoq atuartut annertusisamik immikkut ittumik atuartinneqartut ilarpassui amerlaqisut timelærerinit imaluunniit ilinniartitsisunit immikkut ittumik perorsaariaatsinik ilisimasaqanngitsunit atuartaasarnarat annertuumik ajornartorsiutaasoq. Allaat oqaatigineqarpoq immikkut ittumik atuartsineq ilinniartitsisunit naammaginar-tumik ilisimasaqanngitsunit ingerlanneqarpat, meeqqat atuartinneqartut atugari-saat ajornerulersiinnarneqarsinnaasut. Peqatigisaanillu eqqarsaatigigaanni Akile-raartarnermut Atugarissaarnermullu ataatsimiititaliarsuup naatsorsorsimagaa immikkut ittumik atuartsinerit 54,7%-iisa missingi ilinniartitsisunit naamma-ginartumik piginnaasaqanngitsunit ingerlanneqartartut (qupperneq 30), aamma atuartut 475-t 2011-mi immikkut ittumik annertusisamik atuartinneqarnissaat naatsorsuutigineqartoq Aningaasanut Inatsimmi takuneqarsinnaalluni (Konto pingaarneq 40.10.13-mut missingersuutitut ilanngunneqartoq), taava "Atuarfitsia-lak"-mik taagorneqartumi ukiormannaannaq meeqqat immikkut ittumik atuartinneqarnissamut pisariaqartitsisut 260-t missaat ilikkagaqarsinnaassutsi-mikkut atugarisaat toqqaannartumik [ajorseriarsinnaasut](#) naatsorsorsinnaavarput. Ataani atsiortoq assigalugu Naalakkersuisut isumaqarpat tamanna aarlerinar-luinnartuusoq, ajornartorsiullu unigani suliniuteqargineqartariaqartoq? Taamaap-pat Naalakkersuisut qanoq iliorlutik suliniuteqarniarpat?

(Inatsisartunut ilaasortaq Olga Poulsen Berthelsen, Inuit Ataqtigiit)

Tungavilersuut

Ilinniartitaanerup qaffakkiartornera tamatsinnut iluaqutaasoq tamatta isumaqatigiis-sutigaarput, innuttaasoq inuiaqatigiillu ataatsimut isigalugit iluaquserneqartarlutik. Ilin-niartitaaneq naalakkersuinikkut salliutitaavoq, Ilinniartitaanermullu pilersaarut 2006-imi Inatsisartunit akuersissutigineqarpoq, 2020-mi sulisinnaasut 2/3-ii piginnaanngortitsi-sumik ilinniagaqarsimanissaat tassuunakkut anguniagaalluni.

Suliami tamatumani meeqqat atuarfiat assut qitiutinneqarpoq sulilu qitiutinneqaqaluni. Imminummi napatissinnaasumik aningaasaqarnissarput pitsaanerusumillu siunissaqar-nissarput tungavilerniarlugu amerlanerusut ilinniagarnissaannik naalakkersuinikkut anguniakkatta angunissaanut meeqqat atuarfiat meeqperiviillu tungaviugamik.

Akileraartarnermut Atugarissaarnermullu ataatsimiititaliarsuup nalunaarusiamini tikkuar-paa meeqqat atuarfianni ataatsimoortut qajannarnerpaat tassaasut meeqqat suugaluar-

nersumik pissuteqartumik immikkut ittumik atuartinneqarnissamik imaluunniit immikkut ittumik perorsaariaaseqarluni sullinneqarnissamik pisariaqartitsisut. Nalunaarusiami atuarneqarsinnaavoq:

“Akileraartarnermut Atugarissaarnermullu ataatsimiititaliarsuup ataatsimut isigalugu paasivaa, immikkut ittumik atuartitsineq aningaasaqarnikkut, aningaasaliissuteqarnikkut atuartitsineremullu tunngasutigut akunnattoornartumut qimagaasimasutullusooq ittoq, meeqqallu immikkut ittumik pisariaqartitsisut atuarnerminni naammaginartumik ikiorserneqartarnermut ilisimaneqanngilaq”.

Immikkut ittumik atuartitsineremut atatillugu sakkortusisamik suliniuteqartariaqarnerput Akileraartarnermut Atugarissaarnermullu ataatsimiititaliarsuarmit issuakkap erseqqivissumik takutikkaa isumaqarpunga, taamaattumik suliaqarfiup ukkatarineqarnissaa kissaatigaara. Amerlanerit ilinniagaqarnissaannik unammilligassaq inuiaqatigiittut akuerereerparput. Ilinniartitaanermilli suliniummut sapinngisamik amerlanerpaat ilaatinniarnernannik unammillernartortaa sulinermi tamatumani puigussanngilarput.

Sapaatit akunneri sisamat qaangiutsinnagit apeqqutima akineqarnissaat kissaatigaara, malugeqqullugu aasaanerani sulinngiffeqarneq pissutigalugu akissuteqarnissamut piffis-saliussaq sivitsugaq malinneqaqquneqartoq.